

मार्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै श्रुति खजुरिया।

Headlines

1- लोकसभा चुनावें दे 5में गेड़ तैहत कल 60 प्रतिशत शा बी मता मतदान दर्ज कीता गेआ। लेफ्टिनेंट गवर्नर होरें बारामुला च सब्भनें शा मता मतदान होने पर लोकें ते दुए सरबंधी धड़ें गी मुबारकबाद दिती ऐ।

2- मुख सचिव अटल डुल्लू होरें जम्मू-कश्मीर दी पूरी पराती सुरक्षा स्थिति दा लेया जायजा। सैलानिएं, नागरिकें ते सियासी कारकूनें दी व्यापक सुरक्षा यकीनी करने लेई इक कमेटी दा गठन बी कीता गेआ।

3- डिविजनल कमिशनर जम्मू रमेश कुमार होरें जम्मू प्रांतै दिएं मुख सैलानी थाहरें पर शुरू कीती गेदिएं विकास पैहलकदमिएं दा जायजा लैता।

4 इंडिया स्किल्स 2024 मुकाबलें च जम्मू-कश्मीर नै 11 तगमें जिते। इंदे च 3 सुन्ने दे तगमें शामिल न जेड़े फ्रांस च खेड्डे गेदे अंतरराष्ट्रीय मुकाबले च जिते गे।

हुन खबरें दी तफसील कन्नै प्रोमिला जम्वाल।

<><><><><><>

Voting- 5th Phase

लोकसभा चुनाएं दे 5में मरहले लेई मतदान शांति ते रमानदारी कन्नै सम्पन्न होई गेआ ते रातीं 11:30 बजे तगर 60 प्रतिशत शा बद्द मतदान दर्ज कीता गेआ। इस चरण च 6 राज्यें ते 2 केंद्र शासित प्रदेशों दी कुल 49 सीटें लेई मतदान होआ। एहदे च उत्तर प्रदेश दी 14 सीटां, महाराष्ट्र दी 13, पच्छिम बंगाल दी 7, ओडिशा ते बिहार दी 5-5, झारखंड दी 3 ते जम्मू-कश्मीर ते लद्दाख दी 1-1 सीट शामिल हियां। जम्मू-कश्मीर दे बारामुला पार्लियामानी हल्के च कल मतदान शांति ते रमानदारी कन्नै सम्पन्न होई गेआ जेदे च 57 फीसद थमां बद्द मतदाताएं अपने वोट पाने दे हक्के दा इस्तेमाल कीता। ध्यानजोग आली गल्ल ऐ जे एह आंकड़ा पिछले 35एं बरें चा सब्बनें शा बद्द ऐ। उआं बिहार च 55 प्रतिशत मतदान दर्ज कीता गेआ जिसले के झारखंड च 63 फीसद शा बद्द, लद्दाख च तकरीबन 70 प्रतिशत, महाराष्ट्र च 54 प्रतिशत मतदान दर्ज कीता गेआ। इयां गै ओडिशा च 69 प्रतिशत लोकें अपने वोट पाने दे हक्के दा इस्तेमाल कीता। इस मरहले दे सम्पन्न होने करी आम चुनां हुन 25एं राज्यें ते केंद्र शासित प्रदेशों दिएं 428 पार्लियामानी हल्के च पूरा होई गेदा ऐ। उआं अरुणाचल प्रदेश, सिक्किम ते आंध्र प्रदेश दे विधानसभा चुनां बी सम्पन्न होई गे न ते ओडिशा दिएं 63 विधानसभा सीटें लेई बी मतदान होई गेआ ऐ।

<><><><><><>

LG-Sinha Congratulation

जम्मू कश्मीर दे उपराज्यपाल मनोज सिन्हा होरें बी बारामुला पार्लियामानी हल्के च बड़ा मता मतदान दर्ज कीते जाने पर जम्मू-कश्मीर दे लोकें ते सब्बनें धड़ें गी मुबारकबाद दिती ऐ। इक

सोशल मीडिया पोस्ट च उपराज्यपाल होंरें आखेआ जे बारामुला पालिर्यामानी हल्के च 58 प्रतिशत शा मता मतदान दर्ज होना बड़ी खरी ते लोकें अंदर विश्वास बदाने आली गल्ल ऐ। उनें लोकें गी इन्नी मती गिनतरी च वोट पाने लेई मुबारकबाद दिती ते मेद जाहिर कीती जे अगले चरणें च बी इयै नेया उत्साह दिक्खने गी लब्बोग।

<><><><><><>

CS-Security

मुख सचिव अटल डुल्ले होंरें सैलानिएं दी आमद गी ध्यानै च रखदे होई कल सिविल ते पोलीस प्रशासन कन्ने इक उच्ची सतह दी मीटिंग लाई ते जम्मू-कश्मीर दी हालिया सुरक्षा स्थिति दा जायजा लैता। मुख सचिव होंरें आखेआ जे पिछले 4-5 बरें च जम्मू-कश्मीर च अमन-शांति दा मता विस्तार होआ ऐ। उनें आखेआ जे सैलानिएं दी रिकार्ड आमद ते चला रदे संसदीय चुनाएं च मतदाताएं दी रिकार्ड शिरकत, अमन-शांति दा गै नतीजा ऐ। उनें आखेआ जे अमनो-अमान दे इस माहौल गी जोफ पजाने आलें कन्ने सख्ती नै निब्बड़ेया जाग। पोलीस महानिदेशक आर.आर स्वैन होंरें आखेआ जे कनून नाफिस करने आलियां एजेंसियां नागरिकें दी सुरक्षा यकीनी करने लेई हर मुमकन कदम पुट्टा'रदियां न।

<><><><><><>

Div-Com

डिविजनल कमिशनर जम्मू रमेश कुमार होंरें कल जम्मू प्रांतै दिएं महत्वै आलिएं सैलानी थाहरें पर चला'रदिएं विकास पैहलकदमिएं दा जायजा लैता। इस दौरान घराना वेटलैंड, सुचेतगढ़, आक्द्राय पोस्ट, झज्जर कोटली, अम्बारां, रणजीत सागर डैम, बसोहली, सरुईसर-मानसर, कटड़ा,

पुरमंडल-उत्तरबहनी, शिवखोड़ी, भद्रवाह, पाडर ते प्रांतै दे दुइए बड्डिएं सैलानी थाहरें पर सैलानिएं गित्तै स्हूलतें दे विकास ते ढांचागत सुधारें बारै तफसीली चर्चा कीती गई। डिविजनल कमिशनर होरें गी दस्सेया गेआ जे सुचेतगढ़ च 500 फुट आले राश्ट्रीय झंडे गी स्थापित कीता जाग।

<><><><><><>

CS

मुख्य सचिव अटल डुल्लू होरें सैलसफा उद्योग दे सरबन्धी धड़ें ते प्रशासनिक अमले दे वरिष्ठ अधिकारिएं कन्नै बैठक लाई। इस बैठक च होटलें आले ट्रांसपोर्टर्स, कारोबारी, हाउस बोट मालक, पर्यावरण अनुकूल सैलसफा ते साहसिक उद्योग कन्नै जुड़े दे लोक शामिल होए। जम्मू आधारित इनें लोकें एहदे च वर्चुअल माध्यम राएं हिस्सा लैता। मुख्य सचिव होरें आखेआ जे सैलसफा इक्क प्रमुख चीज ऐ जेदे कन्नै मते सारे लोक जुड़े दे न ते स्हाड़े केई नागरिकें दी आजीविका बी जुड़ी दी ऐ। उनें सैलसफा मैहकमे गी नेइमां तालमेल बनाइए कम्म करने पर जोर पाया। इस दौरान मुख्य सचिव होरें सरबन्धी धड़े दिऐ मंगें ते सुझाएं गी बी सुनेया तां जे इस सैक्टर दा बाद्दा विकास होई सकै। उनें जम्मू-कश्मीर गी हर मौसम च बेहतरीन सैलानी थाहर दे तौर पर विकसित करने लेई सब्बनै पर जोर पाया।

<><><><><><>

DDC-Reasi

रियासी दे जिला विकास कमिशनर विशेष महाजन होरें दिल्ली-अमृतसर-कटड़ा एक्सप्रेस-वे दे दोमेल कटड़ा हिस्से पर चला रदे कम्म-कार्जे दी रफ्तार दा जायजा लैता। एन.एच.ए.आई

उधमपुर दे प्रोजेक्ट डरैक्टर अनुज कुमार सिंह होंरें जिला रियासी च प्रोजेक्ट तैहत होआ रदे निर्माण कम्में दा विस्तृत ब्यौरा दिता।

<><><><><><>

ते हुन बाकी दिएं खबरें कन्नै श्रुति खजुरिया।

Anti Terrorism Day

अज्ज आतंकवाद रोधी दिवस मनाया जा रदा ऐ। एह दिन साबका प्रधानमंत्री राजीव गांधी हुंदी पुण्यतीथि दे मौके पर मनाया जंदा ऐ। 21 मई 1991 गी अज्जै दे दिन LTTE दे आत्मघाती मानव बम नै उंदी हत्या करी दिती ही। इस दिन दा मकसद आतंकवाद दे समाज च हिंसा दे माड़े असर बारै लोके च जागरूकता पैदा करना ऐ।

<><><><><><>

India-Skill

इंडिया स्किल प्रतियोगिता 2024 कल दिल्ली दी द्वारका स्थित यशोभूमि च सम्पन्न होई गई। एहदे च 30 राज्ये ते केंद्र शासित प्रदेशें दे 900 विद्यार्थिं हिस्सा लैता। जम्मू-कश्मीर नै इस प्रतियोगिता च शानदार कारकरदगी दस्सी ऐ। जम्मू-कश्मीर दे दस्ते नै 20 हुनरें च टकोहदी कारकरदगी दस्सी ते एहदे च 22 प्रतिभागिं हिस्सा लैता। जम्मू-कश्मीर नै 3 सुन्ने दे तगमे, 2 कैह दे तगमे ते बेहतरीन कारकरदगी लेई 6 इनाम हासिल कीते। हुनर विकास सरबंधी सचिव राजीव रंजन होंरें जेतुं गी मुबारकबाद दिती। उनें आखेआ जे इस प्रतियोगिता च साहड़े युवां दी उपलब्धि, उंदे हुनर, उंदी सख्त मेहनत, निष्ठा दी तस्दीक करदी ऐ। एह प्रतियोगिता इक मंच उपलब्ध करोआंदी ऐ।



Industrial Visit

चंद्रकोट सरकारी पालीटेक्निक कालेज आस्सेआ इलेक्ट्रिक इंजीनियरिंग दे चौथे समिस्टर दे विद्यार्थिं लेई ग्रिड स्टेशन मैत्रा दे दौरें दा सरिस्ता कीता गेआ। इस उद्योगी दौरें गी इदारे दे इलेक्ट्रानिक्स ते कम्युनिकेशन इंजीनियरिंग सीगे दे प्रमुख इंजीनियर पवन कुमार हौरें झंडी दस्सिए रवाना कीता। दौरें दौरान विद्यार्थिं केई सारे सौआल बी पुच्छे जिंदा माहिरें आस्सेआ परता दिता गेआ। इस दौरें गी लेइए विद्यार्थिं च बड़ा मता संदोख हा। एहदे कन्नै उनेंगी मता किश सिक्खने ते दिक्खने दा मौका थहोआ।



KVK-Samba

कृषि विज्ञान केंद्र साम्बा आस्सेआ कल बांस दी काशत ते ओदे इस्तेमाल बारें इक कार्यशाला दा सरिस्ता कीता। एहदे च राई-बाई मैहकमा दे 21 अफसरें हिस्सा लैता। इस कार्यशाला दा मकसद साम्बा दे कंडी इलाके च बांस दी पैदावार गी बढ़ावा देना ऐ तां जे करसान अपनी आजीविका कमाई सकन। कार्यशाला दौरान मुख साईसदान प्रो. संजय खजुरिया हौरें बांस दे महत्व, ओहदी काशत, एहदे इस्तेमाल बारें दस्सेया। उनें बंजर जमीन पर बांस लाने लेई गलाया। इत्थे एह दस्सना लाजमी ऐ जे सांबा जिला बांस दी काशत गी बढ़ावा देआ रदा ऐ। बांस कुसै बी थाहर लाया जाई सकदा ऐ। बांस दा इस्तेमाल निर्माण, कलाकारी ते होर दुई चीजें आस्तै कीता जंदा ऐ।

<><><><><><>

Tarnah-Bridge

लोकें गी मेद ऐ जे जिला कठुआ च दयाले चक्क थाहर बनाए जा रदे तरनाह पुल दा निर्माण कम्म बरसांती दे मौसम कशा पैहलें-पैहलें सबूरा होई जाग। एह पुल पिछले साल हाड़ें करी रूड़ी गेआ हा ते गड्डियें दी आओजाई लम्में रस्तेयां होआ रदी ऐ जेदे नै ट्रैफिक जाम लगदे न ते गंभीर समस्या पैदा होंदियां न। भारतीय राष्ट्रीय जरनैली शिड़क प्राधिकरण तरनाह नाले पर पुल बना रदा ऐ। इस पुलै दा निर्माण कम्म मुकम्मल होने आला ऐ। लोकें सरकार गी अपील कीती ऐ जे इस पुलै दा निर्माण ओंदे बरसांती दे मौसम कशां पैहले करी लैन तां जे लोकें गी कोई औख-परेशानी नेई आवै। स्हाढ़े संवाददाता कन्नै गल्ल करदे होई इलाके दे इक स्थानीय बसनीक नै आखेआ।

.....बाईट.....

<><><><><><>

National-Highway

जम्मू-श्रीनगर राष्ट्रीय जरनैली शिड़क अज्ज गड्डियें दी आओजाई लेई बंद रौहग। जम्मू-कश्मीर ट्रैफिक पोलीस नै अपनी इक सोशल मीडिया पोस्ट राएं जानकारी दिती ऐ जे अज्ज कुसै किस्म दी गड्डी गी भाएं ओह ताजा फलें-सब्जियें, मवेशियें जां सुरक्षाबलें दियां गड्डियां बी की नेई होन, जम्मू थमां श्रीनगर ते श्रीनगर थमां जम्मू जाने दी इजाजत नेई होग। राष्ट्रीय जरनैली शिड़कें पर जरूरी मरम्मती कारण इयां कीता जा रदा ऐ। उयां जम्मू थमां रामबन, चनैनी, डोडा,

गूल, पत्नीटॉप, बनिहाल, श्रीनगर तगर दी आओजाई बी रोजी दिती गेदी ऐ। लोकें गी आखेआ गेआ ऐ जे ओह् अपने सफर दी योजना इनें हुकमें गी ध्यानै च रक्खियै बनान।

<><><><><><>

DLSA-Jail Visit

जिला कनूनी सेवा प्राधिकरण कठुआ दे चेयरमैन अशोक कुमार शवन होंरें कठुआ दी जिला जेल दा दौरा लाया ते उत्थे कैदिएं गी दिती जा रदी सहूलतें ते जेल दा जायजा लैता। दौरे दौरान चेयरमैन होंरें जेल परिसर दा दौरा लाया ते उपलब्ध सहूलतें दा निरीक्षण कीता। उनें बक्ख-बक्ख बैरकें च बंद कैदिएं कन्नै गल्ल कीती ते जेल च उनेंगी दिती जा रदी रूट्टी-पानी दे म्यार ते सेहत बारें बी पुच्छेया। उनें जेल दे वीडियो कांफ्रेंस हाल, मेडिकल क्लीनिक, कनूनी सेवां ते सहूलत आले केंद्र, रूट्टी पकाने आली थाहर ते जेल दे शौचालयें दा बी निरीक्षण कीता।

<><><><><><>

Read by: Shruti Khajuria and Promila Jamwal

D.E.O : Varinder Sharma

MTS : Tarsem Lal

Editor : Mustkeem Baig